

A S. M. EL REY  
**DON ALFONSO XII**

Y A S. A. R.

**LA SERMA. SRA. PRINCESA DE ASTURIAS**

**EN SU VIAJE A MIERES.**

**ROMANCE EN DIALECTO ASTURIANO.**

Dexáime q' alegre cante  
 la «bendita Madalena»  
 y «¡ay! un galan d' esta villa»  
 y q' al aire la montera  
 con tal reflundiu la tire  
 que cuando baxe á la tierra,  
 en llugar de la *piconá*,  
 solo apañe una rodiella.  
 Dexái que de gozu lláncie  
 un iñuxú en 'a Pasera  
 que 'l ecu repita 'n Seana  
 y contestáu en 'a Peña  
 á la par que 'n Figaredo,  
 Ujo, Villayana y Lena,  
 al son de l' alegre gaita,  
 con *trapiquinos* de fiesta,  
 á gálamos, al oillu,  
 la xente á la villa venga.  
 Dexáime gritar ó muerro...!  
 pos per lloca la mollera  
 tengo des que sé q' á MIERES  
 llega el Rey co la Princesa.  
 Aquí 'l soplu embalsamáu  
 que troca 'n xardin la Vega  
 y fái se besen les plantes  
 cuando sele les solmena,  
 amorosu, co los rizos  
 xugó, cuando neñu yera,  
 del q' agora ye 'l monarca  
 q' España adora y respeta.

En MIERES calzó madreñes,  
 vistió calzon y montera  
 con ramu de siempre-vives  
 que i dimos d' amor en prenda,  
 y hasta paliquin llevaba  
 al colar por vez primera  
 pe les calles adornáes  
 de la ciudadá de Fruela.  
 Hoy el rapacín d' entonces  
 ye un mozu q' á so presencia  
 s' alegren los corazones  
 pos Dios en so bien se fuelga.  
 Hoy aquel neñu adoráu  
 ye de la española tierra  
 el enfotu y l' alegría  
 de q' estaba tan famienta.  
 La Corona de Castilla,  
 la q' al sol sin brillu dexa  
 pos mas que rayos aquesti  
 cunta proeces aquella,  
 firme, sin que taramielle  
 enriba de so cabeza,  
 sabrá llevar, como sabe  
 llimir l' aceru so diestra.  
 En él en sos verdes años  
 s' afaya valor y cencia  
 y per el bien de la patria  
 mil veces y mil morriera.  
 ¡Válgame 'l Señor San Pedro!  
 ¡Válgame la Madalena!

Viva 'l Rey Alfonso doce  
y d' Asturias la Princesa.

Non diga que y' asturianu  
el q' á mirallos non cuerra,  
nin quien arródie una seve  
por afayar saltadera.

Regatu, ponton, folleru,  
sucu, bardiales ó presa  
que pel camin s' alcontrare  
la mocedá non detenga.

¡Blinca un galgu?—Pos el galgu  
envidia la lixereza

del astur que 'n es montañes  
vió la lluz por vez primera.

Mil ixuxús per gañote

(y non ye muncho 'n concencia)

serán los q' al aire asorden  
cuando s' entame la rueda.

Y si quixés la fortuna  
que falatible lu viera

y escuchás' lo que del alma  
pruye por salir afuera,

diríai: Señor, si España

da gracias á Dios contenta

porque la de San Fernando

llucir mira 'n to cabeza,

el pueblu astur, el modelu

de valentia y sofrenia;

el que por mote gloriosu

lleva la nostra Princesa,

en tí s' enfota, y co 'l alma

en que tu imáxen s' alcuentra,

al cielu soplica homilde

que te depare la fueya

mas gloriosa q' en 'a Historia

del mundo miráse pueda,

y así diga: «ALFONSO DOCE;

dignu de memoria eterna,

foi el ánxel de sos pueblos,

el amparu y providencia

del probe y del desvaliu...!

en él s' afayó grandeza

virtú, valor... y utru sábiu

como 'l utru Alfonso yera.

Lloró España apenadina

de tan xustu Rey la pérdiga,  
grande la fexo y dichosa,  
foi bonu... ¡benditu sea!»

Esto, Señor, deseamos  
cuando vicácanos tengas,

y non dudes que quien fala  
el alma ye, non la llengua.

Volvi ¡oh Rey! á estos llugares

d' apacible primavera,

onde 'l sol non turra á naide

nin el friu á naide xela.

Aquí 'l cielu dadivosu

¡niño q' al furar la tierra

filones topás' el home

d' incomparable riqueza.

So la pelada montaña

en 'a cucuruta mesma,

fierro, carbon ó cinabriu

fai rellicir la piqueta.

¡Ay! el dia que xiblando

rodiada de fumareda

de Xixon salga la máquina

y per Castilla se meta;

cuando desllombáu 'l Puertu

los pueblos astures vean

y en el Musel mil vapores

fáiga añáse la maréa,

aquesi dia, bon Rey,

nin Francia, n' Inglaterra,

nin Animania, nin Suiza,

nin los Estáos d' América,

por mas que co 'l diañu escurran

y cavilando s' esmuelgan,

trabayu bonu i-os mando

pa ganámós la palmeta.

Adios, Señor, que la xente

de miráte está famienta,

y ya griten en 'a danza

«Viva ALFONSO y la PRINCESA.»

Así-i falaria homilde

quien nació en 'a Pasera,

como MIERES, lu saluda

gozосу

TEODORO CUESTA.